

武定詩續鈔

六七八

14
743
19



44
743
19



武定詩續鈔卷六

利津李佐賢竹朋編輯

吳之裕

字問亭海豐人秋谿公姪廩貢官淄川訓導王農部毓

傳公任淄川學博不一載即灑然而歸賦性高明讀書不屑估畢之功而能縱觀得其大畧博覽載籍不名家詩筆靈活每為小札寥寥數語餘味曲包嘗記有輓人夫婦並弟歸空聯語歸去自攜仙眷屬春來誰夢舊池塘之句可想其筆墨之高潔篤於孝友接人無城府不立崖岸歸田後芒屨竹杖望若神仙中人

早行

行客警雞鳴我比雞鳴早出門月在天四野白皓皓朔風摧樹

正字詩編金
枝嚴霜壓枯草。冷氣剝肌膚。似未著絮襖。辛苦舊飽經。嗟我年
今老。此時錦堂人。壺觴正未倒。

祝王淑齡六十壽

君如松柏我蒲柳。少年結契今成叟。絳縣千支歷已周。君有好
顏我衰醜。猶憶雞窗共視席。風風雨雨常相守。壯歲嗟我爲飢
驅。東西南北疲奔走。有時遠道賦歸來。家園樂事惟良友。翦韭
烹葵互主賓。小具盤飧開笑口。邇來知好漸凋零。四方況有游
蹤久。檢點樽前現在身。朋舊耆宿君其首。新秋值君覽揆辰。炎
暑初消涼透牖。登堂攜壺爲君祝。大椿八千君同壽。中秋月滿

蚌胎肥。看取驪龍珠在手。世事浮雲不足論。請盡卽時一杯酒。

聞張誠之訃音

涉世論交契。惟君意最真。如何三月別。便作百年人。無子誰傳
業。能文不救貧。晨星悲冷落。一念一酸辛。

村居雜詩鈔一

暝色蒼然合。柴門野望閒。霞蒸原上火。雲湧樹頭山。村塾蒙童
散。寒郊牧豎還。紛紛塵世事。心遠不相關。

客程早發

旅舍荒雞早。霜天塞雁過。疏星明遠樹。曉月落長河。殘夢依稀

醒客懷感慨多。棲鴉眠未起。聞鐸更移柯。

肥城李文止五十年前窗友也。癸未晤於明湖。贈以二律。

五紀歲華更相逢。感慰并百年。堪幾別一話似三生。笑我鳩謀

拙。憐君鶴俸清。時李爲德平廣文雞窗辛苦意。到此失崢嶸。

昔年游息地。林壑杳難尋。昔在肥肄業於牛山書院。每憶之不忘白髮悲存歿。青

山閱古今。書堂蘿月入。樵徑嶺雲深。幸遇南園叟。時時話故岑。

李所居南花園

胡桐園赴天津便道見過喜而有贈

不意停車騎。歡然倒屣迎。三年千里隔。一笑兩心傾。坐久忘更

漏。談深倒酒觥。吾徒行老矣。聚散感勞生。

暮齡得子感而有作

五十五翁方得子。中懷輾轉喜兼愁。成人敢望誇麟鳳。老我於今效馬牛。蹇劣竈門應易跨。瘦寒詩卷尙期收。塗鴉待爾能翻墨。絳縣千支筭已週。

題秋林讀書圖小照

問柳評花逐勝游。廣陵城郭洞庭舟。而今老去情懷減。卻愛荒寒一段秋。

過邯鄲盧生廟

百年如夢阿誰知。擾擾營營亦太癡。瓦枕不須勞借我。今生早
是醒來時。

宿潘家店

瀲灩清流匯野塘。依稀風景似江鄉。阿誰解唱吳孃曲。暮雨瀟
瀟斷客腸。

乞龍井茶

湖山佳處憶勾留。龍井靈芽碧泛甌。料得清芬隨篋笥。可能遣
送晚甘侯。

張星槎升任來楚以二十八字迎之

孤斟聽雨小窗隈。此夕聞君蒞楚來。寂寞白頭江上客。歡顏酒
抱一時開。

同張光宿李漪園王淑齡杜幼和王介夫信陽城看桃花
秦時花樹漢時城。問訊東郊結伴行。行到城中花正好。雙柑斗
酒聽嘯鶯。

著意尋春春可憐。風懷杜牧尙依然。銜杯偶憶江南夢。水閣瀟
瀟雨似烟。

歸途漫賦

獨輪車御自逶迤。緩轡春郊不厭遲。一載般陽無長物。卷中添

得數篇詩

吳之勤

字翊臣號淦崖海豐人前鈔恭定公孫乾隆己亥舉人

官至安襄鄖荆道著叶夢樓詩贖

公家乘初任知縣歷武邑東安昌黎尋調

清苑署遵化知州歷升天津同知黃州知府安襄鄖荆道道光二年致仕歷任以興學校恤民隱為先武邑水患為災公歷勘五百餘村倡捐設粥廠全活無算在河防同知任值大水單隄一綫危若纍卵公駐工督弁搶護三十餘日每值風雨弁役欲逃散公屹然不動卒得保全黃郡書院傾圮公捐廉增置數十間籌添膏火並捐書籍肄業者益眾諸生於講堂後為位祀焉鄖陽僅有書院基址無脩脯膏火之資公捐廉倡修併以襄鄖入官道產取租為書院經費自是生徒日盛幾如黃郡自縣令至監司三十年所到處人思詠之而治黃最久

黃士人計借北上來京耶詢起居者猶不絕也

戊申二月客金陵謁雪鴻先生里居招飲園亭並贈以畫

短古二章用代東謝卽以誌別

鈔一

主人具雞黍招飲碧池旁盤飧翦園蔬玉粒春南鄉

金陵南鄉米色味絕

開軒敞虛白止水凝清光少焉上初月坐久生微涼長史亦

畫聖潑墨染天香乃復不自師而仿陳白陽贈我一尺素飽我

十日腸明朝理歸權此意兩難忘

雪堂寶硯歌用東坡石鼓歌韻

我初得硯歲丁丑摩挲恍見東坡叟流光彈指去來今七百餘

年歸下走。暗中呵護如有神。心得所好笑在口。靈蹟顯晦詎偶
然。宦緣況是承公後。公昔團練來黃州。不如意事常八九。風塵
溷跡漁樵間。且學淵明種楊柳。躬耕廢地計亦佳。薄祿猶勝營
五斗。撐腸文字空爾爲。十指懸槌時運肘。大江東去撈銅琶。往
事烏臺慎言莠。雪堂四壁森暮寒。此硯與公爲素友。學佛常伴
怪石供。肯爲藥籠收馬敦。池邊洗墨蟠蛟螭。浪湧烏雲篆蚪蚪。
春風笠屐遺圖開。想像蒼髯怒黃耇。磨竭安身箕舌張。舒亶安
心甘犬彘。卽今手澤出人間。古色彬爛重尊旨。又如鐘呂聲嚼
飴。洗盡淫哇奏矇眛。中央題識尙宛然。字赤石青樞响嘯。縱幾

八寸廣半之。四角藏棱堅且厚。是時公未嶺外行。端谿驛寄知
誰某。鐫劖手試昆吾刀。檢點行囊誇富有。蠹魚食字墨磨人。夢
醒春婆離械杻。雪泥偶爾留飛鴻。白衣那記成蒼狗。買田陽羨
有夙心。奎宿生天信非偶。伊余蒞郡展遺祠。親蕪瓣香一低首。
山頭妙墨剔蘚苔。最屬摧殘惜攻培。零縑斷帛如雲烟。鐵網珊瑚
渺難取。快哉片石出韓陵。鸚眼刮青絕纖垢。傳家藉作清白
貽。永用寶之子孫守。後塵願步長帽翁。石墨鐫華垂不朽。銘心
檀匣此奉持。眞手不壞仁者壽。

和嚴匡山廉訪奉

命再除湖北臬使紀

恩原韻

秦關入覲計程遙。玉珮千官共赴朝。又起東山持絳節。高瞻北斗麗丹霄。春如挾纈心先煖。人覺披雲翳自消。舊種梧桐應得意。綠陰爭茁鳳棲條。

和嚴匡山廉訪出都四首原韻 鈔三

五雲深處奉鸞書。猶聽鐘聲戀帝居。入境仁風先露冕。應時甘雨自隨車。節因青女知松勁。心爲蒼生似竹虛。樂歲桑麻開畫本。檐帷游目暫踟躕。驛路花明稱意看。攀轅曾記昔時難。一帆楚水恩波潤。四扇潼關曉日寒。徼外宣風聽畫角。關中覓句付歸鞍。康侯晝接天

顏喜 紫誥親除墨未乾。

朱旗迤邐出都城。指點雲山召伯營。爪印三年留治績。口碑千里識民情。關心訟牒紆籌策。到耳絃歌起頌聲。最是吟懷當勝地。甘棠樹樹拂驂行。

留別黃州同官紳耆兼示書院諸生

青綬垂腰十六年。齊安久住亦前緣。滿城山色開圖畫。比戶書聲當管絃。每對棠陰思召伯。偶持蕉葉酌坡仙。輕才自分藏鳩拙。何幸恩光到日邊。

郵亭話別正初秋。僂指苔岑幾舊游。交到將軍如大樹。傳成循

吏盡中牟公餘接膝閒揮麈雨後關心課買牛久向高齋施一榻年來李郭恰同舟

朱旛引隊駐江干此日歌驪別最難竹馬兒童今老大蓮花賓客舊盤桓琴尊列座縈清夢筮屐成圖結古歡便是西山拋未得臨歧柱笏又重看

鹿洞遺規做四箴生徒列侍講堂深幸魁今歲探花宴差慰連年種樹心篤課書宜勤鐵鎬論文我愧度金鍼名山風雨伊人共纔賦蒹葭思不禁

樓臺迴望總關情鶴俸支來手自營百尺飛翬新學舍三年運

璧此江城清池洗墨源頭活赤壁鐫華石骨橫一事更逢心賞處沿隄插柳已陰成

算來八境屢經過徧聽康衢擊壤歌雀角風清知俗古馬頭雲起覺山多連村打稻民同樂到處懸鞭政不苛寄語杖鳩諸父老近時耕鑿復如何

名賢勝蹟鎮追隨宦轍經由事亦奇山月江風蘇子賦微雲疏雨浩然詞竹樓問鶴尋遺址峴首逢人訪斷碑檢點輕裝殊自笑一船書畫最相宜

五雲深處捧恩綸繡服先頒列郡春葵藿有心依北闕金

湯作鎮控西秦。舊盟白水原知己。此別青山是故人。高挂片帆
回首處。盈盈江漢望雙鱗。

題閔正齋漁父圖

兩人同業復同行。手把綸竿各有情。與爾商量垂釣處。不關名
利莫相爭。

杜彤光

字赤文號莘田。濱州人。虞臣公子。附監生。以孫受田。

贈大學士著拙修齋詩

田家雜興

烟起遠山暝。日暮牛羊歸。人家暖燈火。靜掩林下扉。羣動悄已
息。星河耿寒輝。廣場坐終夕。涼露霑裳衣。

巴東道中

巴江東下駛如箭。喧轟爭與山石戰。擊排衝突勇莫當。礪砢欲
逐江流轉。峽江峭壁立如削。古木青藤掛葱蒨。東烟接峽西
雲仰首望天天。一纜我來秋雨時。飄蕭青泥盤盤路迴旋。巨濤
掀簸聲撼股。懸厓欹傾勢壓面。仄徑陡上如蟻緣。俯瞰無底馬
蹏顛。十步九折非吾欺。所聞猶不逮所見。陰風颯颯鳥飛絕。寒
日慘慘猿聲變。下視行舟波上飛。萬谿訝中一帆串。柁防篙護

人喧呼有生到此命何賤此行出險到夷陵會有霜髮巾傍現

北村

去城一二里臨水兩三家新翠瓜分蔓幽香棗作花聲喧雲外
碓痕縐雨餘沙趣向閒中得誰云樂有涯

晚出西郭

棕鞵竹杖興偏饒獨步何須客見招落日鴉聲城角樹秋風人
影水心橋寒生砧杵衣初薄陰戀松杉酒易消偏是愁懷增感
處蒹葭隔岸響蕭蕭

上思城樓晚眺

邊城樓上暮吹笳日盡南天落晚霞四野香聞金桂樹萬山紅
綻木棉花環流插竹租魚浦傍舍懸壺賣酒家瘴雨蠻烟渾未
識卻忘身在粵江涯

杜光彥

字炯巖號煦南濱州人諸生著澤裕堂詩草

泊黃浦江

旅泊江東岸孤舟傍驛亭鄉心沙月白客夢楚山青灘湧潮聲
壯窗懸雨氣腥殊方風景異飄泛厭浮萍

居庸道中

茫茫關外路驅馬意悠哉蒼鶻盤空健黃沙捲地來孤烟生野
戍落日下荒臺始信京華好雲山首重回

張青萍

字秋浦號薛門商河人諸生著醉月堂遺草

山村

嵐光一抹靄沈沈錯落茅檐隔小岑萬壑秋聲黃葉下四圍暝
色白雲深誰家書閣留殘照幾處炊烟入遠林獨向蒼茫擬投
宿崎嶇幽徑草邊尋

魏申錫

字方來利津人廩貢著無方居士遺詩

王世勳無方居士傳云公性恬

退無宦情好購書朝夕講讀性理五子近思錄等書而嗜莊列尤篤故又號無方居士云

明妃曲

乘騎出漢關馬驕妾意懶馬戀塞草肥妾戀漢宮暖君恩未得
承君情自欸欸一被畫師誤永與漢宮斷琵琶引路長淚灑征
鞍滿思君夢為雲朔風吹不散

觀蝶

關情物候麥黃秋蛺蝶紛飛逐化游上下枝頭爭栩栩不知若
個是莊周

題桃源圖

白雲封住武陵春。五百餘年少問津。不是桃花流洞口。誰知晉代有秦人。

吳秉堅 見前鈔

字含真。號過亭。霑化人。海嶠公會孫。稟真著峴雲堂詩。

公家傳能窮究性命學。窺濂洛諸儒闢。奧而孰吟如性命。為餘山太史高足。

荊州懷古

重鎮臨江踞上游。當年天險此雄州。烽消壁壘烟塵淨。浪湧魚龍日夜浮。一代文章誇屈宋。三分霸業憶孫劉。行人欲問興亡

跡。雁渡平沙野水秋。

霽後同朱衛水登熨斗臺

宿雨初晴長子隈。衝泥遣悶向層臺。南臨邑郭羣山拱。北壓原林二水迴。隔座青松穿徑出。近人白鳥破煙來。空留讓跡高千古。回首滄桑歷劫灰。

蘇劍青 見前鈔

字佩曾。號念園。霑化人。竹浦公從曾孫。諸生著念園詩稿。

寄中臺吳二弟

靜掩柴門歎索居。那堪更與酒杯疏。對牀可愈經年病。開篋頻
看前日書。夜月初驚南浦雁。秋風將化北溟魚。懸知得意歸來
早。寄示新詩一起予。

李植

字扶萬號武林霑化人。諸生。著南游草粵游草。

秋夜獨坐

空庭人不到。萬籟靜無聲。久坐看雲變。遲眠待月生。誰家飛玉
笛。隔院沸銀箏。那識懷鄉客。終宵夢未成。

宿新店驛

溼烟薄霧隱山阿。古驛松杉間薜蘿。屈指計程愁尙遠。傾囊沽
酒恨無多。晡前下幔防蚊入。夜半鳴鑼驚虎過。共道炎天行貴
早。只愁難遣睡中魔。

辰谿縣

踏盡松陰苔蘚斑。亂峯叢處一城環。官無訟牒門常閉。市少經
商屋半閒。水落泥痕猶在壁。雨收雲氣尙浮山。桑麻雞犬多幽
趣。爲近桃源咫尺間。

沅州山行

十步曾無一步平。入來難更預期程。人緣絕壁攀藤過。馬怯危

武定詩集 卷六
橋下水行。樵子裹糧編竹筏。山僧施茗結松棚。但求一榻隨時設。卽是空中現化城。

王采珍 見前鈔

字崑巖濱州人乾隆辛未進士官至衡州知府著蜀道

集

下瞿塘

開山見山罅。蛟龍踞爲舍。灑頰蹲其門。飛鳥不敢下。昨登城上樓。江流共天瀉。暗谷藏風雲。陰崖失曉夜。鳴舷擲如梭。欲罷不能罷。

曉過淇澳故趾

淇縣北門外有碑夾道溝渠猶在。菘竹無存者。淇水橋離城五十里。

晨起訪故都。驅車北門去。雲沈樹杪月。風散馬前霧。緬想君子墟。而今渺何處。不見淇上竹。但見淇水注。行行淇水橋。橋頭悵難遇。彼美天一方。夕陽在高樹。

井陘關

井陘脈發太行山。關南北隘口三十餘處。

太行分八陁。井陘列其五。谿衍開戍牆。隘口難悉數。連山常積

陰削壁倒垂縷。側身龍潭下。亂石微雜土。峽底蹙歇鞍。飛鳥無
疾羽。雲深晝長晦。霧溼細成雨。盡日彎以環。不辨是亭午。幾攀
雲梯上。晴際翳復吐。無能解塵渴。况乃值炎暑。為語行役客。莫
傷行役苦。關南復關北。幾見有豺虎。二三戍關士。醉眠雜笑語。
淮陰昔談兵。今世不尚武。但見龍門河。滔滔自終古。下井陘水流灣環干

太華山

呼吸通帝座。高高落飛雁。橫空灑玉泉。明珠星一串。落雁峯即中峯又名
星明

介山

天功孰能据。人事何足怪。天人兩相持。無甯守吾介。介子流風
高。歎息我行邁。昔從何獨愚。今去何獨憊。榮名羈中人。賢者立
不敗。長嘯登高岡。俯視破塵界。草木何寂寂。空山絕機械。古人
不復見。古道振聾聵。因人以名山。歷劫山不壞。曠字居胃切應人未韻未與卦

鳳嶺

岐周鳳鳴後。鳳去尙餘嶺。俯視羅羣峯。層疊現奇境。迴鞍鳳城
下。薄霧隱烟井。胡然雷雨來。晦明變俄頃。急滿走巖穴。奔流若

馳騁雙虹倒垂峽。征馬勢相併。土人爲我言。近喜豺虎靖。恍聞高岡鳴。吹落天風靜。少時霞彩生。返照碧梧影。

褒谷

愁雲橫天霧氣惡。懸排峭峯俯臨壑。黑龍怒吼奔流來。日陷風翻樹搖落。忽聞樹裏走江聲。劉項相持氣未平。馬道追亡路隨轉。將臺推轂人皆驚。秦州自古龍戰地。雲橫飛馳歎何易。七盤嶺下如縑流。漢水嗚咽增暮愁。

咸陽渡口

自古帝王州。於今渭水流。波翻初日上。風捲宿雲收。隔岸人呼

渡。登城獨倚樓。終南猶在望。千載思悠悠。

灞橋

函谷聽鶯度。灞橋停馬看。天空平野肅。雲淨遠山寒。風雨嚴金鼓。波濤溼玉鞍。由來征戰地。無復舊長安。

潼關城樓望黃河

萬古此悠悠。蒼茫一望收。誰探星宿處。遙指水源頭。隘地風雲暗。寒天日月流。羣峯帆外落。凝望幾登樓。

登襄陽城樓

荆襄自古今。落日一登臨。遠樹浮烟潤。高雲傍閣深。碑餘羊祜

正字詩補金
淚江見杜陵心。憑弔情何限。停舟待月吟。

岳忠武廟

誰下班師詔。空悲射虜書。兩宮終不復。百戰竟何如。風折南枝勁。雲迷北望孤。森森遺廟肅。浩氣滿清虛。

登白帝城

白帝城高百尺樓。憑臨今古望中收。水穿巫峽風雲暗。山鑿夔門日夜流。自昔三巴盤鳥道。祇今八陣護龍湫。千年興廢知何盡。惟付長江一葉舟。

巴東縣

江流三峽雨。地接五谿雲。客夢驚灘瀨。猿聲莫更聞。

映秀灣

插壁天低樹。空江浪拍雲。帆隨峯數轉。落日已西曛。

中秋卓克塞雨後玩月

雨鬪星光暗。風雲護月華。濤聲傳萬壑。夢裏已天涯。

荊門州道上

馬嘶古道暮雲屯。一抹烟收舊雨痕。三國六朝遺恨在。山川曲曲抱荆門。

由小大關山長老坪登相嶺世傳武侯征孟獲駐軍處

白雲堆裏萬山開。澎湃奔波澗底洄。亂石當關尋故壘。一山俯壓一山來。

風吹霧散翠雲邊。晴暗平分各一天。二十四盤盤轉下。剖開混沌是何年。

史尙確 見前鈔

字易齋樂陵人乾隆丙子舉人官蘇州同知

房公甘泉歌

太守守樂德廣覃。政成民易泉亦甘。甘泉直挹廉泉廉。甘泉如化貪泉貪。當年酷烈苦嚴刑。犁耳車缸紛難名。大圍初解廣陵

城。江北父老江南行。樂陵一郡獨衽席。三合潤洽甘泉液。酌泉思公飲公和。酌泉薦公歌公澤。君不見百里嵩刺徐州年。甘雨如酥隨車游。又不見循行南國古召伯。甘棠芟憩遺愛傳。吁嗟乎嵩之雨兮房公泉。召之棠兮房公泉。

吳湘 見前鈔

字衡湘號素軒霑化人含真公姪乾隆丁丑進士由檢討官至工科給事中

揚州

客程疑借閩風飄。縹緲丹霞聳麗譙。白紵歌中青雀舫。紅樓天

半玉人簫江空瓜步涵秋色。波到雷塘識暮潮。千載蕪城明月夜。碧山依舊水迢迢。

吳江

字南川號未軒霑化人素軒公弟乾隆壬申舉人歷官

雲南候補知縣濟南教授著李春山房詩存南川時文

稿海豐張怡菴先生吳公傳先生母病割股作羹以進
寢逾年每盛暑雷雨輒夜起逡巡樞左右兄弟終身友
愛不異稚時其仕滇也值軍務委運軍需徵調土兵皆
無誤時大將軍某性驕恣僚屬文員亦令膝行叩頭尤
生曰屬吏見長官會典有常儀何至屈身如奴隸進見
長揖將軍怒將不利於先生上官調護始得以教職降
補任汶上曲阜訓導陞濟南教授訓諸生先行後文坐

春風者翁然悅服工制藝梓
行三百首濟南北圭臬奉之

晚眺

平楚縈斜照遠見山崢嶸。孟夏風氣美臨眺遐心生。茂林駐夕
蔭野水涵晚清。沖飛亂烟裏一鳥戛然鳴。曬網漁人結荷蓀農
夫迎出作復入息無患亦無爭。息機有暇日食力多餘情。不見
負苓者含醉歸山城。

夜行

歲晏客懷急扁舟西復東。關河誰問渡風雨夜推篷。漁火來何
處灘聲過遠空。嚴寒真太逼鑪底一星紅。

再至省垣有懷謝張兩先生吟此代柬

萍蹤去住付波流。策蹇重為濟上游。邊李詩名憐異代。鵲華山色入深秋。梅花又結春風約。張鶴柴先生和予見梅之作因鬢寫圖見贈且邀明春一晤濟上影還添歲暮愁。結習不除真自笑。解裝先問水邊舟。

買笠

買向街頭席帽輕。東阡南陌足閒行。好風吹處斜隨意。驟雨來時聽有聲。著以輕篋垂釣去。代將團扇障塵生。相逢欲避乘車客。一揖何庸證舊盟。

秋懷

日影蕭蕭淡素暉。時光彈指已全非。藤蘿蔓幕清陰溼。扁豆花添紫豔肥。蟬韻低隨殘暑變。雁聲新帶晚涼歸。柴門靜掩西風裏。落葉飄飄上客衣。

秋日田園雜興

尋詩緩步過柴扉。愧我農非圃亦非。荳蔓菁花秋燦爛。菘畦瓜架雨霏微。開樽酒愛鄉名醉。抱甕心嫌事有機。底事勞勞車馬客。田園蕪徧不思歸。

廬江河口

如雲一徑綠迷離。木葉新齊春暮時。何處花香香不斷。曉風吹

武定詩續鈔
徧野棠枝

焦汝翰

字西園號靜山青城人乾隆丁丑進士官編修著靜山詩集

書懷

醉者墜車神自完蓬瀛遠隔五雲端非非想入夢皆幻薄薄酒
消眠更寒爾足何妨仍負米折腰久嬾莫求官年年於此探消
息已把功名破甌看

武定詩續鈔卷七

李衍孫

利津李佐賢竹朋編輯

字蕃升號味初惠民人前鈔誼堂公子乾隆乙酉舉人

官沔縣知縣著炊菰亭二紅齋谿上吾廬詩集哀劬堂

稿郡志文苑傳衍孫乾隆乙酉舉人中已丑明通榜生
平博覽強記無書不讀出宰關中補沔縣令調任蒲
城歷有惠政尤加意人才識王定九相國於童試拔置
榜首為官十年未六十解組歸里與諸文士酒讌商訂
選輯武定明詩四卷國朝詩十二卷鐫板行世工書
法善畫蘭竹著有炊菰亭等詩集存家○張南松學使
鵬展山左詩續鈔味初輯武定詩表揚先哲而於忠孝
節義之作尤諳諳致意有功於梓里者也○余選公詩

武定詩續鈔

卷七

甫畢入都於嚴肆得公畫山水一幅筆墨落落大方方知公爛六法不僅以蘭竹擅長尤喜翰墨之有緣也

重過泰山下作

膠葛湖陵巒。東嶽俯其偶。扳華復提嵩。形儀肅九有。亢父梁父輩。相揖就培塿。弱歲披圖經。數珍逾佩玖。心折天帝孫。而難不脛走。長記竹林蹤。負笈長春阜。乙酉共鹿坪叔謁萊蕪尹張崑白師歸途青嶽陽池擬謁西母。吾叔澹蕩人。塵衣爲抖擻。初步櫻桃園。維與麋鹿友。大石巨然筆。古穴蛟龍守。琅玕覆清瑤。綠酣掬中酒。一曲亦靈境。况迺兩三畝。小憩青帝祠。雕甍結螭紐。偶試雨前茶。鐘聽蒲牢吼。望望天宇黑。駿鳥將沒西。短榻咨山僧。埽愁竟無帚。大

嚼屠門過。空說流涎口。想像天鷄鳴。海日大於斗。猶冀來朝登。細意窮巖藪。巨篆相斯書。大夫蒼髯叟。爛醉嘯天門。急蟬據高柳。袖攬浮邱狂。肩拍洪崖右。一杯見東瀛。眼界或不苟。客夢小游仙。夢覺一搔首。侵晨風勢惡。雪花竟如手。吁哉清緣慳。無以滌塵垢。彈指餘聲中。時光亦已久。策蹇又夕陽。岱雲應識某。

登黃蓋峯

落日天風鳴。隱隱暮雷吼。振策偶登高。茲崖亦已隄。昨釋形家言。實爲崧高首。佳氣莽迴互。虛嵐動深藪。竟體蜿蜒來。渾向天南走。丈夫困牖下。蒿萊歎十畝。遠行良獨難。茲游亦不苟。所惜

隔全嶽向輸烟霞叟。時余未及作全嶽之游故云山靈為余言靈境會須有

蓄意貴不盡神交益耐久不見含苞花未聞香彌厚恍然結遙

思所箴永吾守浩歌歸去來眾形一駢拇嶽雲來送余混茫眾

山口

雜詩十章留別華州牧陳八樾齋玉鄰鈔二

公令漢臺旁余吏河陽左同伍如治兵交泊喜連舸有憂抱終

天閔凶忽罹我行行良獨難雙足繭以跋菩提露枯竭斷絲理

纏裏立許痠痺人再轉等蓬顛

丈夫經世業並榮天人爵進遂達簪裾退肯負林壑逸以樂編

氓勤可司擊柝區區抱微誠終覺便耕鑿文字吾糟粕謳吟時
閒作翱翔太平年願翼報恩雀

秋日攜高甥統之應垣赴東村作

連月苦囉嗟生活愧計研得隙出郭來快比翔風鳶小車禿無

蓬單轂輕而便欲雨未雨際席帽撐雙肩有時雨聲鬧急節生

繁絃絲散溼衣袂既晴媚郊天一道入濃綠禾稼紛我前如雲

復如油三露接五烟滿腹未耕經妙諦空言詮陌上游俠兒交

舞珊瑚鞭豈不矜豁達風姿美且鬢而我菰蘆人所事但石田

已老分菽麥努力猶躡躡所恃甥勝舅頗冀夔憐蛇從此隨農

夫日抱黃犢眠。願言田功畢。於公歌獻豳。

田禾詠 鈔二

穀

南人重香秔。北地首粟穀。滑膏膏吾肌。穠中稀米粥。腰謝白粲長。氣讓紅蓮淑。雖未登嘉筵。頗可饜茹屋。甲我霜雪鄉。持此豚酒祝。忽憶桃花酸。堪捧藜藿腹。余食稻有時作酸至道在中庸。淡泊有高躅。非不愛大名。思之已爛熟。北人呼粟穀為小米。稻為大米。

黍

在昔注食經。於黍有深喟。伯仲膠牙餉。胚胎酒從事。作糕待客

題。融蠟替人淚。彈指一炊間。功名卽蓋世。

田具詠 鈔四

犁

農家有大器。權總一張犁。鞭鳴霹靂車。銳利分水犀。正攻赤堠墳。側切昆吾泥。不有疏導功。何以粒羣黎。余生舊習懶。苦不親牧羝。近問猗頓術。先算甦與雞。蓼雨青蓑客。秋風綠楊隄。隴上耕已辦。餉黍煩山妻。

鋤

古人扣牛角。兼以鋤帶經。仰我百世下。慕古空復情。不鋤亦不

讀。耽擱忽一生。垂老力猶健。蕪田安可耕。非種視爲仇。當門底須爭。有時荷篠倦。靜聽流水聲。水流無東西。墟烟一何清。

碌碡

萬物各有任。苞育纒以密。不勞宛轉力。何以去麤質。田家有頑石。輪困亦遭叱。體大抱貞操。鎮物無疇匹。體靜用則動。變化一何疾。嘉穀之菁華。枝幹爲扎櫛。一夕落糾葛。忽若枳化橘。種出糠粃中。爰言人事畢。莫以畢人事。而忘謙則吉。礮研仍須人。物有實中實。所以碌碡功。不尸碾磨秩。

固骨碌

如車不服箱。尋行歷南東。轉圓快當軸。軋軋秋風中。是物寓至道。帶索出牛宮。匡矩規其輪。體小用則豐。取象妙於離。兩圈腹中空。義詮周濂叔。經逸陸龜蒙。祇殿耕種後。詎尸納稼功。安土而能敦。坦坦境之通。崇實卽黜浮。硜硜效微忠。履不越阡陌。字以田舍翁。

鄰翁餉棗感賦二十韻

吾家負郭田。西郊二三里。數頃雖瘠薄。猶足供甘旨。田畔二百株。濃陰亦可喜。五六月之間。香噴棗花裏。佳實競垂垂。日顆纒風紫。田去樹亦枯。歲深情何已。新居禿如童。白沙空秋水。亦有

鄰家樹。秦越在尺咫。詰朝見承筐。白髮秉前軌。報我以赤心。勞
我之殘齒。脆欲嚼珊瑚。甜可融渣滓。世少安期生。詎有如瓜理。
念此百益紅。象形無漏子。人情盛餽遺。玉帛土苴耳。有時萬里
瓜。祇以爲嚙矢。何如田舍翁。歲時相密邇。將敬一剝間。不儉而
不侈。此意沁心曲。爲棗亦色起。物小理綦恭。里仁斯爲美。渺矣
念先疇。含悲淚如泚。

秋日懷余吾弟時將自觀城返里

春社燕方乳。秋社燕如客。此中離恨天。反覺酒腸窄。君去爲一
官。官餘半膝席。前何如弁髦。今何如求宅。適垣而索塗。所擁皆

阻阨。悠悠念人生。當著幾兩屐。昨日郵書到。期爾中秋夕。空見
金背蟬。相約竟何益。陰晴萬里同。布指能知尺。想爾此夕酒。懷
兄見肝膈。我家三荆樹。高枝萎在昔。幸存吾與爾。分飛悵行役。
駉蛩那能單。鴻雁常怕隻。世人飽蓬蓬。閱牆動相嚇。不知一人
身。秦越揣肥瘠。感子廉讓江。界限不能隔。思爾日以長。遣愁漫
無隙。聞已來鵲湖。傳言竟難覈。田家一把鉏。農歌三疊拍。朝看
豆葉黃。夕牧草梢碧。日月壺裏長。襪襖身上澤。十年食肉相。一
變烟霞格。子來須及秋。協力督臧獲。用賦觀稼詩。緩理繞朝策。

病牛歎

髡屯擗以修醜質一何健。稚草青茸茸。忽忽不能飯。決鼻太羈
 縲垂頭小縋。縋鶴倦惜羽。翮鴻傷寄哀。怨爾本田野。材闕入老
 農園。純讓犧牲軀。性慙麒麟植。我既為爾食。爾即為我勸。奚取
 吳月喘。直學鉛刃頓。將毋田單燒。不然鼯鼠困。偶蹶一時蹶。差
 減千里願。含淚告主人。難圖有滋蔓。纏絡固其勢。犁泥為所涸。
 敢謂土不蘇。頗有癡可獻。戀豆荷恩慈。感遇潛灰空。豢養希有
 終。筋力殊覺鈍。環顧秋雲禾。田功囑人建。

河干

殘雨晴河干。夕霞逗村屋。一一佔人帆。言向鐵門宿。我來訪沙

鷗鷗睡清且熟。爭食何紛紛。滿眼鷺與鷺。

過會山寺

羊虎踏平沙。亂石森龍從。路轉心彌惑。拭目辨西東。到寺不見
 寺。蒼鬱松雲中。溼痕泥新色。急濤瀉遠風。鼠黠或避人。鳥闕噴
 維驄。入門足幽討。古殿高穹窿。綵幢一一懸。布金踰十弓。彈指
 開皇年。達人有微衷。閒問琉璃壇。會訪蛟龍宮。細雨紛溼衣。積
 翠峯寒在空。虛臺復虛臺。前路何溟濛。嵩嶽厚坤土。忽見疏鑿
 功。一泉汨汨來。曲折階除通。匯作清泠池。亘以垂澗虹。餘波香
 積甌。涓滴無初終。世間好富貴。誰為主人翁。禽生意浩蕩。裙屐

亦匆匆。鄙哉浮屠輩。更圖瞽與聾。且吃趙州茶。跌坐荒草叢。雨
餘結遙思。落日銜山紅。

朝食無米示余吾

捲簾受微風。朝慵未梳洗。齋厨告困竭。飯甕亦空啟。腹枵家人
怨。客到不能禮。昨日撤屋茅。作薪供竈底。無茅卽無薪。釜有水
清泚。雙弓那須諱。澁乃文字體。千金經再散。固窮吾根柢。負手
行庭陰。牆腳露春薺。心苦黃蘗甘。交惕小人醜。刀屈鏡能爲。玉
賤鵲可抵。物態任紛紜。靜觀偕吾弟。未索仁祖食。咄咄陶範米。

擬登金山不果

楊子江水何泱泱。就中砥柱山青蒼。浮玉有頂煥樓閣。朱霞天
半生晶光。我聞古仙人。煉形住紫闥。又聞瓊華闕。配以光碧堂。
龜山山下九重水。洪濤萬丈搖扶桑。今此金山母乃似。中冷第
一泉花香。了元瓢笠長公帶。應共塵劫灰飛揚。四大皆幻況微
物。禪心清淨江天長。買舟競渡者游子。勝情無具偏激昂。擬索
仙人九節杖。攜來巖岫凌八荒。雷電晦冥急雨至。寒日如墨沈
遐方。榜人催客坐。渾似棲榆枋。風力一帆疾。倏過崑崙岡。迴首
寥陽幾宮殿。游龍交馳朱紫房。彷彿神山海上轟。縹緲之峯鬱
相望。鸞車羽輪不可到。一鷗天地烟茫茫。

過仙霞嶺

白日陰沈天地昏。四山雲影失昏曉。威魂魄鬼聞越間。隱赫鬱
 壘須江表。卉木髮蔓春正濃。綢繆縹繡山爲卦。玉珮琤琮溜風
 竹。笙竽雜還激杉松。翠崖高拱丹霞障。縹路直開半天上。荀與
 不坐拄杖行。攜手狂客神俱王。余與張硯田步行來者蠕蠕懸山腰。丈
 人偃僂新承蜩。步武徐徐不一失。輸與狡鼯工飛超。蜿蜒三百
 六十級。磴道曲蟠青壁立。巔頂伏看下界塵。一氣混茫通呼吸。
 重關巨鎮誇金湯。險要直可一夫當。半壁東南此喉咽。往來似
 蟻趣行裝。昔聞興朝正九域。小醜未靖森戈戟。連雞曾此逞

羣陰。南戒倉皇斷于役。先公建節矢嬰城。旗舉姑蔑貌貅驚。焮
 拉雷厲夜督陣。躡駢駘駘騰軍聲。仰攻此嶺據其岳。身先士卒
 心如鐵。耳畔石矢交旬訇。威重如山就行列。妖氛已靜天無愁。
 陳豨腔血污靈邱。百戰論功鐫彝鼎。老臣白髮霜盈頭。百年滾
 滾馳烏兔。傳說星辰紀行路。小子今詣舊戰場。猶向荒崖問古
 戍。先公祠近衢州門。手澤祇今嶺上存。天雨庵記三百字。豐碑
 青結苔花痕。目注神移巉巖側。郝腹不儲無顏色。十年願翻萬
 牙籤。洗滌心胷賦祖德。更願畫法宗營邱。危峯疊嶂圖十洲。二
 儀吞吐元氣瀉。擲筆一笑驚伏虬。

風雹行

六螭息轡金輪藏。舟人睡倒軀已僵。三更噫氣號萬竅。飛車疑
 束奇肱裝。元鶴翔前虎吟後。霹靂挾電寒生芒。腥雨翻盆貫雹
 疾。飛弩三萬喧錢塘。舵翁夢醒魂魄死。澀喜舉謬聲顛狂。乃知
 沙隄斷竹纜。六幕昏黑波中央。後灘前灘不數里。亂石羅列森
 鋒錯。況復建船薄如紙。建谿有紙船鐵捐翁之謠白晝猶苦多伐戕。平生行
 邁仗忠信。到此未免勞周樟。夏侯讀書任焦柱。吳猛劃水渡豫
 章。仙凡久判恒沙數。古人引領空相望。清流名船幸膠白沙磧。如
 靖內寇餘外攘。風伯移時收跋扈。海童無復從狻猊。諸船無恙

漸次集烟月。依舊菱花光。山山送黛施膏沐。姮娥擬下雙鸞凰。

食荔支放歌

釘坐真人世所殊。釵梁玳瑁爭喧呼。紅紗丹衣玉爲膏。妙筆猶
 紀眉山蘇。粹液難駐差堪虞。一日已變傾城姝。二日三日生香
 無。糟粕何益中乾枯。焦核尤重閩海隅。宋香陳紫繁根株。異客
 往往三山趨。冰盤擬荐頰虬珠。佳時或過空踟躕。綠陰如蓋蔭
 山岨。走也自慙賦蟪蛄。春秋不識心迂愚。昨來福唐春色徂。日
 向黃蘗償詩逋。已聞丹荔熟江衢。口涎滿貯玉唾盂。妍姿俄見
 紅模糊。千錢可買供飢軀。初食涼沁心脾俱。元冰九子光瑤瑜。

滑如截肪脂凝酥。味和勺蜜盛冰壺。奇踰五黃和璧輪。王逸品
第良非謾。大嚼頗可醫清癯。汁染指臂淋細絢。仙家盤盞羅珊
瑚。紅觴甜雪斯真腴。冰桃碧藕登斯須。春霄久豔西母厨。側生
今孽紫綃膜。便疑身到神仙都。兩履更乞雙飛鳧。故鄉倏返宅
一區。筠籠持獻高堂娛。諸父飲噉充清醑。兄兄弟弟相怡愉。餘
者遺我同心乎。

採紅花曲過新鄉作

采采野田中。此花顏色好。染作歌舞衣。朱門壓素縞。朱門紅紫
何紛紛。新鄉婦女無完裙。

寓嵩嶽下作 有序

戊戌夏豫方伯禱雨中嶽甘霖立沛。大中丞徐公具疏
以聞。詔新嶽祠沁園觀察往董其役。余偕佳嶽陽二日。
未得一探其勝。率成是作。

吾皇四十有三年。內帑敕給中州錢。擬新廟貌答嵩嶽。金
粉界畫丹青懸。維嶽降神列爲五。三公視爵尊垓埏。泰岱雄稱
嶽之長。兩大直與滄溟傳。方位若論大居正。崧高轉執中央權。
陽城有臺立圭臬。四時測景終無偏。茲嶽精英露光怪。脈絡曲
折聯三川。員嶠方壺並輝暎。太室少室三花妍。三十六峯藏雲

雨夕霏朝霧相新鮮。一柱中天縮四極。東西南北紛鈞連。提綱挈領取諸震。方策遙拱臨其全。恍以太極生四象。象包一畫義皇前。王者卜洛古稱治。四方和會歌平平。來朝還見列侯采。宅中時又多敷宣。中嶽之形母乃是。靈爽實踞明神先。今歲陰陽偶愆伏。豫州待澤枯源泉。屏翳不來阿香遁。劉城簫鼓空嗔闐。皇帝曰咨汝方伯。禱茲崧嶽明潔蠲。奉命馳驅迅至止。齋心知荷蒼穹憐。設壇甫竟已如霑。流膏徧沃三農田。嶽靈奕奕紀功德。棲神允矣恢雕椽。鳩工庀材救疆吏。碧油紅旆來翩翩。分巡使者謂張沁園華國器。吾鄉英妙芬蘭荃。攜余共次嶽之下。

詰朝將詣青螺巔。徧與諸峯共揖讓。霞觴十舉酬山鵲。洛汭茫茫赴眼底。周基一覽窮中邊。興餘畢搽方回洞。進食玉女停雷輶。野性素共麋麋友。曠懷擬拍洪崖肩。迺聞山磴壞積雨。何啻弱水橫三千。蓬萊咫尺不可到。鹿鹿人海同周旋。余生有志躡禽向。命薄往往乖清緣。岱宗兩過皆虛負。流光淹忽愁餐眠。何日先修濟勝具。烟霞飽踏芒鞋穿。獨往題名續師跡。錢唐桑改甫師嶽游詩有是處題名獨往生句山屏大筆深磨鐫。諸嶽歷盡佳茲嶽。嵩祠信宿談元禪。落日殘霞倚桐栢。旅楹松桷看間榭。回頭此日壹笑樂。巴山夜雨存茲篇。

得石圖詩為家鐵橋作即示黃九有序

鐵橋吾宗步任城學宮殿西階下得片石于古樹根遂
出之土石久剝僅存隸書二十餘字辨為膠東令碑漢
物也錢唐黃小松寫得石圖紀之庚子秋七月兩君見
過寓齋鐵橋出此索詩率題三十韻

潭雨入夏狂蛟螭霹靂夜撼牆壁欹移榻高阜聳檐檻綺疏外
布谿之陂秋來四日已殊絕況復佳客謂小松停文驪折柬招邀
及宗秀鐵橋風神閒暢彌清爽袖出一圖僅兼寸古淡直欲無隄
廉雙樹如削秃且仆殘石力作千鈞支細繹題字三百徧迺知

韻事關靈祇鐵橋平生邃于古金石搽討忘昏疲橋門日暇偶

禹步茲石識作珣珥琪石腹裏向捫以手字痕詰屈欣分披劇

掘立除蝸牛篆洗剔嫌汲泉花遲坐令漢家膠東碣恍然頽脫

毛生錐為此圖者我黃九冰雪襟抱仙人姿家法寓林遠焜燿

明少參貞父先生為小松遠祖近承堂構聞風詩考松石先生以博雅名小松能世其學一官紀

游南池畔論交識得匡山伊小松與鐵橋交最契捫蘿披蘚有同好爭長

壇坵三公碑小松儲碑版拓本近千種不亞鐵橋曾于直隸元氏縣得漢元初四年三公山碑合浦還

珠獄出劍異寶雖晦無終遺磁石引鍼不一失物理以質何文

為世間好尚亦軒輊阿堵中物甘如飴銅山既傾洛鐘應攘攘

矛戟營其私。鷄疑蛇笑任紛糾。不齊之情原如斯。公等好奇奇
逾法。蝌蚪坐擁軒與義。結想日復徧人境。餘力差可窮邊陲。參
軍者亭云伊黎南山有久與此事為擔荷。精神命脈生以之。陽
張騫碑時小松道及之冰信宿率更臥。巨手今古風輪持。真龍每為好龍下。奇峯繼有
飛來時。醉後結詒復三歎。屬君慎守無娛嬉。秘藏飛天有保衛。
六丁追取良足疑。闕堂大笑盡卮酒。簾外暝色來堦墀。遠雷作
聲電飛火。涼颺隱隱敲垂恩。

騎驢夜行偶作

驢小難稱鞍。長不滿三尺。零丁荒徑中。篤速明河夕。冷月滿長

秋。亂沙没行跡。載已輸多愁。身或同墜策。遂謂廬山公。真媿騰
霜白。吁嗟乎千里蹏。有驚蹏時。此驢雖蹇任所之。

贈吳南川江表兄

李春山人太崛奇。滇南一令敞屣之。公為雲南令來就人間荒

涼寂寞之經師。春秋所典牲與犧。一改冷署人人之所為。清官

第一名不墮。朝衣典罷朝。嗚饑抽簪仍賦歸。田詩祖龍臺下開

絳帷。公授徒生徒翹望招搖旆。承魁文昌真在茲。歲時一返徒

駭湄。家園子弟相追隨。中秋有月香葳蕤。山人醉倒心神怡。余

村櫛比陶家籬。訪君不翦之蒟茨。入門握手驚且駭。霜華白於

先年髭。感舊試問燕山知。君家給諫今白眉。謂素軒先生墓木已拱增悽歎。還顧白邱泣如灑。時光如電何能羈。迺知萬遇皆不居。向來人事歸鱗差。貧賤富貴如朝露。正身履道以俟時。有時睡美醒而思。老翁香飯憑軟炊。從此向平婚嫁畢。所冀看山禽慶同壩簾。甲辰雄與甲辰雌。且付田家賽社之一卮。君居河之湄。余家渤海陸。暇日同舟舟可儀。聽湘靈之鼓瑟兮。舞海若與馮夷。

寓靈佑宮東廊觀階碑記事效柏梁體

碧虛樓閣玉橋旁。金粉已黯神祠荒。客來行笈紛攜將。瓦銚煮

茗龜支牀。小步輓轡鳴我腸。閒階綠澁苔衣蒼。最屬雙聳螭首

昂。簪碑字字諳宮商。霞騫雲搆祀玉皇。如椽筆迺萬夫望。碑為福清

葉文忠公撰文並繫以詩此祠插草指大璫。司禮監魏學顏初旃蒙單閱歲月長。共

事碑陰一一詳。西者領袖為某王。王名常瀛家奴適足喪天潢。勤慎

夫人金花香。牌子某女某某行。碑載彭金花及某某等奴東者領袖官階彰。

學顏大字標中央。諸監纍纍蝟與蟾。餘子魏某書膠庠。庠生魏某等四

人母亦璫族之諸郎。熹廟人事歎重創。小人女子真跳梁。逆焰

烈於炎崑岡。金錢十萬一擲狂。此錢來路供披猖。白日狐鼠忘

退藏。公然土木災一鄉。調停宰相吟丹房。知蓄全力擊封狼。此

瑞激發須天良。青瑤鐫德希流芳。碑云公性忠愛肩事精敏今昔觀者如堵

牆混淆不怕人。雌黃想見落成奏。篋簧芳椒工奠百神觴。塗飾

薌澤麗繡襜。遺簪墜珥迷歡場。堅冰之漸沐履霜。茄花委鬼纏

妖芒。前驅赫赫不可當。吾鄉君子聲琅琅。不隨柔浪回風檣。先鄉

達袁忠愍公以忤璫死為海內六君子之一其後人揚齋孝廉時在座故及之人間弔古言沈洋。也知

運數關天常。回眸高視星有光。木魚隱隱宮西廊。

得華山碑記事

西華別來已隔年。舊物尙餘子敬壇。債家譏訶老子笑。一事猶

足償饑涎。少昊之神重文字。西嶽碑版光金天。紙本崢嶸在囊

橐。勝於萬選青銅錢。暇日摩抄一相賞。置身恍入逍遙篇。頭腦

清爽谷神躍。醍醐灌溉沈疴捐。攷古上游延熹載。此碑立在石

經前。歆神致康變六樂。俟日安國司百籟。市石營書紀椽佐。郭

香香察紛言詮。埽卻落葉淨眉目。祇從秋水窺魚鳶。書佐筆妙

擅斯邈。邕雲嗣響森比肩。此書不落作者後。全體骨肉相緜延。

神寒骨重天廟器。雷奔石墜曾城巔。墨莊世寶玉增價。蒼穹秘

惜珠潛淵。遂令鼉屨毀前代。地軸將折任簸顛。碑毀於嘉靖三十四年地震

至今客經桃林塞。寂寂過眼悲雲烟。古榻間出如電掣。往往求

劍空流連。一本曾落郭髯手。周鼎晉犧供几筵。紅豆老人一再

賞。虞戈窮處天心穿。詩筆適為此物辱。母乃造物忌其全。華陰

再傳竹君續。碑為華州郭允伯所藏。後落華陰。王無異家。今歸竹君朱氏。 石墨樓手工磨鐫。

翁覃谿學士有翻刻本。 廬山面目尚髣髴。如飛白書。差足傳。我生夙有金

石癖。漢上搽剔心力殫。石門頌泐鄙閣壞。風霜殘蝕終茫然。丑

冬殘臘花飛雪。歸人甫整青絲鞭。玉女停軒希夷醒。一樽餞我

青柯邊。座間是本揖相餉。丹瓊函可證飛仙。披去文章麗五色。

攜來弱水逾三千。緗帙媿乏惠靈偃。郭氏奴善裝潢。余所得本多錯亂。故云。 長歌

擬撥鴛鴦絃。客裏不忘綠金笺。山中仍抱黃犢眠。余時客玉田。 癡奴

看碑復涕几。怪叫不覺同鳴蟬。寒不可衣飢莫食。問我寶之奚

取焉。

建谿

八閩巖谷鎖南北。神為鐫刻鬼雕刻。聳峭何年劈巨靈。一條白

浪夾山側。完渾膠盪波踰波。天動地吸晝無色。名灘百二森蝟

毛。亂石棋布勢嶮峻。顯者或臥初平羊。隱者或作含沙蜮。或如

豕鼠橫街衢。或如虎豹日僵踣。就中暗淡駭龍門。汨隱漂疾望

不極。舟師眼可窮秋毫。木樨等身掇蟬翼。分水一刀數丈長。縱

控船頭臉霞赭。把柁何人更輕便。使劍如丸鼻無息。伎倆慣與

波濤爭。枯竹作篙聲啾啾。船舷皆椶繩纏。以竹篙可停急溜中。 逆挽會須勞九牛。

一髮千鈞不可測。倏焉兔脫矢離弦。下水迅如雷霆殛。據地或
踰分與毫。撞磕已愁鼃鼃通。兩岸黥鬻富荆榛。猿父獐子工避
匿。厭聞鉤輅格磔聲。山半喚客行不得。丈夫始生志四方。蝸廬
株守嫌偏仄。張騫一槎天漢游。叱馭王遵復傑特。鄙人才地慙
相懸。風波到此增眩惑。何時手操羸政鞭。鞭石赴海日千億。河
道空曠陽侯靈。顛風不作月痕直。荇藻交翠魚跳波。鏡光閃閃
新指拭。近山鬢髻整娉婷。遠岸雲沙立瀉鵬。行人作歌夜鳴榔。
共對杯酒膾鮮鯽。

洛陽旅邸寄余吾舍弟十二首 鈔三

田野連年旱。人言竟不殊。有秋還歉薄。何地可枝梧。晝粥家聲
舊。望梅心計枯。不知諸子弟。從此廢書無。
使君軒裏去。今已到名泉。雞肋愁中物。羊腸夢裏天。緣仍慳大
被。福又想寒氊。小住爲佳耳。差無僕馬錢。弟需次省垣以資斧不給而歸
明日辭河上。到家應歲除。人尊雙僕上。詩富一囊餘。馬齒還加
長。鳩巢任寄居。一番勤問訊。椒酒竟何如。

得同階書寄答

魚鱗書到日。謂我閉門深。不識白頭客。已投黃葉林。亂蛩三疊
唱。哀雁九秋心。感子勞延伫。夕陽生碧潯。

死別已千載。猶如懷遠人。音容癡夢寐。衣履記風塵。屋滅東西
舊。尤跳歲月新。驚秋一行雁。客淚暗沾巾。

懷兄

張夏早發

山氣征衣薄。霜顏酒力增。渺茫沙路月。明滅市樓鐘。鷄唱偏難
曉。驢疲不可乘。谿聲知近水。橋外歇行滕。

坊中早發

寒雞催野店。歸客早登程。雲截山腰斷。天垂雨腳明。荒榛侵古
道。曉竹作秋聲。好到無諸里。西風弔越城。

冒雨偕紀酉山家巨濤仲濤兩兄登高賦詩

客裏重陽歲暮心。肯教風雨罷登臨。披蓑閒趁黃花帽。插鬢何
勞碧玉簪。城上溼烟秋滴滴。河干遠樹晚沈沈。諸君莫問商飈
館。滿地浮雲自古今。

贈王逸莽

六十年來感電光。文章也似閨黃楊。疏籬數尺花爲友。矮屋三
間葦是牆。入世人呼窮措大。埋名心喜老顛狂。等閒歌哭無端
事。落拓吟身正不妨。

歷盡寒窗已白頭。浮雲眼界淡於秋。無情鷗鷺偕新侶。得意琴

書減舊愁。半畝園林容坐臥。一天風月易勾留。大河北去波濤壯。醉裏憑君下釣鉤。

形骸

形骸土木事多違。呼作癡人是也非。新築矮牆牽薜荔。要添枯竹架薔薇。輓轡閒挂青苔井。蝙蝠偷穿白板扉。學圃未成春已半。聊從鷗鳥澹忘機。

高郵道中

布帆帆上駐飛鴉。取次秦郵望眼賒。一抹山青丹竈火。神仙山世傳仙丹處。四圍湖綠釣人家。孟城有驛皆霜草。甓社無珠但荻花。何

處吳孃彈別調。青衫有淚是琵琶。

鎮江懷古

東吳襟帶大江瀕。晝夜寒濤赴海垠。落月荒郊三國戍。閒花古墓六朝人。研山此日書臨米。京峴當年氣鑿秦。莫向清風橋上望。滿隄紅葉曉霜新。

舟抵蘇州

闔閭城郭晚雲遮。卵色天低似若耶。十里旗亭千樹柳。一隄烟月五湖槎。清柔絃索教歌苑。瑣碎簾櫳賣酒家。望裏吳山憐鄧尉。寒香待我是梅花。

衢州隨五伯謁先文襄公祠

妖鳥紛紜百戰場。老臣開濟領巖疆。中樞韓范功名盛。日月中樞倚范
韓桐城張相太末春秋享祀長。花草一祠臨古渡。祠旁雞鳴渡孫曾
公廷玉贈句兩世拜他鄉。居人猶說鏡歌日。茶火軍容耀夕陽。

征衫

征衫短短趁歸裝。風景蕭疏氣倍涼。野火微雲狎鷗鷺。秋山落日見牛羊。客心急似離弦矢。鄉味甜如釀蜜房。紫蠟黃花供我醉。明朝佳節又重陽。

秋夜家曉谷兄顧曲率成一律時七夕後一日

星期已渺憶停梭。月被閒庭雲似羅。向日心情歡樂少。中年兄弟別離多。數聲楊柳因風笛。一曲霓裳斫地歌。眉意暫舒秋又到。娟娟涼露下銀河。

聽雨不寐

灘溜初騎濫瀕奔。錯疑金鼓震黃昏。雷迎急電聲催火。簾捲腥風氣到門。客枕欹斜鄉夢少。病軀調護布衾溫。一燈明滅疏窗下。檢點前宵屋漏痕。

送尚書吳蟻園丈子告歸里

祖帳燕雲肆綺筵。爭誇疏廣大夫賢。蓬瀛閱歷三千水。官驛馳

驅六十年。歸路好經楊柳陌。到家應及棗花天。隣姬製餅田翁
餉。玉屑瓊肌別樣圓。

標采羣瞻孔翠毛。白雲初路卜虔刀。秦關天險資屏翰。滕閣江
聲擁節旄。吏部文章今北斗。蘇公事業舊西曹。百僚師濟楷模
久。不獨金張門第高。

功德羣賢漫較量。太邱名字更馨香。聲清老鳳兼雛鳳。星聚元
方與季方。簪笏一門崇列戟。衣冠四世拜綸章。更聞九老圖

天上。

辛卯 皇上召耆德諸臣 賜宴香山並畫九老圖藏禁中公與焉

壓倒香山白侍郎。

三齊領袖冠人羣。賦就歸田社酒醺。宦夢迷離閒想像。樵風宛

轉妙音聞。琴彈馬谷山頭月。袖貯桃花墅外雲。邑太宰楊夢山先生墅在桃花

嶺我媿通家稱短李。他時白練侍書裙。

都門甫歸卽有河南之游漫成長句。

青鞋踏罷輭紅塵。老大生涯幻夢新。十日家鄉翻哭子。廿年書

劍尙依人。登高會詣嵩山頂。懷古閒過洛水濱。淦淦白雲迴望

處。倚門無計慰雙親。

張沁園觀察將赴河陽偶成七律

上公分陝說周京。棠舍新陰快又成。得第久推前進士。居官不

改魯諸生。衙從洗墨池頭放。張伯英墨池在陝州人擬栽花縣裏行。誰識

節旄全隊外。芒鞋還見一齊俗。時余借往

隋苑

綠滿蕪城不當家。瓊樓玉宇莽天涯。可知西苑繁華夢。便是東
皇富貴花。十部笙歌伊闕盡。百年烟月上陽斜。游人莫問瀛洲
島。滿地秋風急暮笳。

雨中度輓轅嶺

不斷烟霏暮未收。千盤蹬道五丁愁。雨腥高逼蛟龍氣。風急平
添草木秋。直以山氛迷謝眺。還教霞想到浮邱。混茫下界濛濛
裏。洛水迴看曲折流。

大司寇袁公奉使中州督辦工賑上七律十章 鈔二

災祲流行數偶愆。遽聞治水在堯年。幕雲連日無閒岫。秋雨
經旬有漏天。入境已陳民瘼切。封泥頻下帝書傳。敬看御
墨淋漓處。太息中州說可憐。殊批公奏摺有豫民可憐極矣之語
退食清齋對碧蘿。祈晴初罷日華新。當衝已弱三千水。荷鋪長
驅十萬人。壩築東西虹飲澗。地爭巢窟海揚塵。賈生有策勞籌
畫。撮壤休嗟不可堙。

客中雜詠卽留別諸友人十二首 鈔二

兩載專城等伏雞。問心何以對災黎。漫言稂莠為非種。祇覺梧

桐愧故棲。夢到已酣。還有夢。嗚當欲斷。可無嗚。生還得荷。天之覆。拜手全家賦樂分。

錦簇文章太史壇。家門近作落花看。諸昆枉慕珊瑚網。八口交

依苜蓿盤。余吾弟需次學博可藉一茅添敝屋。微聞二豆缺朝餐。鄉思

全集寒鐙夜。捻鼻長吟字亦酸。

將抵華陰寄明府許四古芸光基用樾齋華州卽景元韻

殘雪危橋接華陰。好詩尋徧古桃林。風雲杯底辭河嶽。裙屐年

來敝向禽。世味可知茶共苦。人心直與井同深。從茲勘破浮名

利。乞米翻將舊蹟臨。

過陝州弔張觀察沁園有年

白髮蕭蕭尚倚門。騎箕人已返瑤閭。沁園沒於黃河。雙親年九十餘。不及知也。美銜

三錫榮卿貳。喬木千章蔭子孫。朝廷贈觀察卿銜並予恩蔭未為沙隄成

一柱。但令秋水葬孤魂。八年勞紀响嘯側。不獨文章弔屈原。沁園

善屬文。成乾隆己丑進士

河上哭張三沁園

移山壯志未消磨。精衛銜來細石多。但使四民登衽席。甯辭一

手挽銀河。斷襟連血歸黃土。公葬處只衣襟一幅恨草和人怨綠波。陝州別公

日意甚悵惘風雨猶疑披髮到。忠魂伐鼓擊鼉鼉。竟成永訣

孟縣謁韓文公祠

偶從驅鱷見鋒芒。露盥薔薇諫表香。豈屑浮屠爲敵國。直將名教翊衰唐。斯文蚤伏程朱脈。吾道先行瘴癘鄉。漫與南陽爭地氣。昌黎伯已列宮牆。

贈二僕

貧病時時問起居。他鄉爾輩亦相於。壯人負笈擔簦外。識路曉風殘月初。逐客青山嘲兩鶴。寄書紅豆謝雙魚。從今收入烟霞料。一供吟壇一荷鋤。

清化早發

千巖歷徧白衣回。輾轉通宵只自猜。詩到枕邊推不去。夢於車裏續將來。風生澗壑松濤響。溜放河田竹潑開。輸與人間渴睡漢。不知名利是愁媒。

有以碌磳作白者詩以贈之

磊落山中已有年。遭逢巧匠等磨甄。骨因剛健鋒棱在。道合樞機面目圓。牛後轉聞司稼日。人間勞盡滌場天。荒村退處還無用。拂拭猶同蓋白傳。

喜抵觀城寄余吾

過眼名花似蛻空。無錐可立迺眞窮。登壇老將經三北。迴轍殘

年及二東鄉味到唇先頰酒書函報爾便因風堪憐守歲蒼黃
夜蠟淚闌干兩地中

歲除已近兼程河北不及到泉上訪賣花翁賦此卻寄

未問仙人頃刻花

躡笑泉花局顛倒諸花計此時牡丹已開矣

歸心一例到桑麻可

知債與青年久

又說春同紫陌賒

余未到家友人已有出游之約

作客逾長逾

厭客離家越近越思家荒信面目生來慣不為風塵避峭華

自嘲效放翁體得五十六字

年年增歲還增債日日得愁兼得詩詩到雞林無價處債如珠
浦有還時卻憐富憚鬼神瞰祇許窮令風月知若要柴門斷剝

啄除非先斷借書癡

徒駭草堂題壁

四圍如簇早蜂衙一例衡茅間白沙瓜架豆棚真瑣屑牛宮雞

柵太天斜天涵滄海魚龍氣地接烏衣王謝家

謂吳素軒南川昆季

占得

九河餘派在草堂靈不負烟霞

書懷

田園老興穩探蔬煩惱秋來易破除楊柳徑深牛倒嚼

牛聞臥時倒宿

草嚼之俗名倒嚼

蒹葭烟重鳥懸居

鳥有巢葦梢者俗名葦喳喳

潮人頗恃三分酒

款客盤登一寸魚從此年年滄海上奇文細訂木元虛

秋日出家十首 鈔二

風雪歸裝藉嶽靈。洞天第一本林垌。苔牆藤架無涯綠。雲隴烟
畦未了青。炊黍功名惟麩部。饜人鼓吹是農經。幾曾會得耕三
訣。豔語流傳婦子寧。

勸勉猶能仗老妻。此身常把一張犁。全家薄命甘朝藿。十載勞
心悟夏畦。祇有游仙山上枕。曾無照步水中犀。癡歎蚤受平生
累。喚醒塵緣聽鳥啼。

秋懷四首寄家鹿坪叔 鈔一

三家村畔日于于。近事商量在守株。叉手已輸乾麩子。糞田猶

愧上農夫。朝隄露菜收羊角。野菜名夜斲秋河檢蟹奴。好向此園
稱父老。去毛蒸得爛葫蘆。

書懷

何物勞生役我心。萬般收拾漫閒吟。讓人易退甘三舍。信命多
艱謝五禽。湖海已拌愁境老。鷓鴣甯敵酒懷深。一編還對齊民
術。歲月消磨半陸沈。

冬夜書事四首 鈔二

一更初奏五更終。用成句哀角頻催蠟淚紅。胡蝶夢餘仙亦幻。糠
糜座上鬼猶窮。驚心急劫逢棋局。時索債者橫甚博物殘年憚射工。此

際形容無可問。任人圖畫作屏風。
傀儡終場又暮年。聲名官職兩茫然。農經已注天隨子。滄海猶
賒大願船。莫說情還同紙薄。終慙智不及珠圓。五丁聞有開山
力。可鑿愁人一綫天。

謁先墓

寒食清明物候新。全家上塚及靈辰。天低暮堞雲生齒。風蹴平
田雪作鱗。大鳥不鳴高阜樹。好山爭待遠行人。雙親若問兒何
往。四海茫茫淚一巾。時將有遠行

都門晤監榆弟寶齋述懷八首 鈔二

經年憐汝飽星霜。書劍飄零五十強。再散千金留一鉢。還攜八
口去三湘。寄懷汾水同浮梗。回首皖山似故鄉。話到人生嗚咽
處。哀絃么譜太淒涼。

我亦身如不繫船。隨風漂泊落花天。本無白傅三間屋。僅有江
淹半頃田。霹靂符催前後債。輓轡心轉死生緣。時長兄上閑及
諸弟俱相繼辭世左思醜與安仁俊。余老而醜。監
榆美風貌一例秋霜到鬢邊。

寄張星槎映漢郎中

五十年華付水流。甘心飽食等巢鳩。淮南豆可令人重。渭北詩
能去我愁。時得青門諸
同人消息好夢癡於蕉葉鹿。頑軀健似牡丹牛。分

明辨出田園料底事翻成汗漫游

兩姓簪裾儼比鄰崢嶸門巷記來真陶家黎棗速諸少毛氏功名娛老親顧我翻成遠志草看君已薦大夫蘋榮枯雖別王孫感同是終天抱恨人

法源寺題壁時寓寺舍

贊公房好殿東頭行脚而今得稍休嗜酒便為真淡蕩看花疑入小溫柔寺花樹甚盛戰塵烟散魂臺閑佛骨函深塔院秋一樣髑髏委黃土漫從朝暮議蜉蝣唐太宗憫東征士卒戰亡收其遺骸葬幽州城西為哀忠墓又於城內建憫忠寺即今法源寺又念佛臺前有佛骨一函

自錢唐放舟至富陽作

越女鳴橈豔綠鬟石隄高處日華閒千重樹色千重畫一嶴春光一嶴山

城郭參差暮景昏女牆天半白雲屯孤篷忽轉青山嘴厯盡垂楊是縣門

建甯雜詩 鈔三

光陰兀兀感飛星蹤跡真成水上萍十日舟行山色裏秋風今已到甌甯

遙映丹楓路幾叉市聲山郭小喧譁紫芽薑嫩秋瓜脆未買東

鄉澤瀉花。

賣卜清風香市闌。寒鴉懊惱暮雲間。東谿一派殘秋水。誰問當年謝疊山。

答袁補齋

涼風陣陣九秋初。我意醅醕似醉餘。不是工愁兼善病。家鄉新到數行書。

游春詞十五首 鈔八

海豐北信陽城故址。左右四五里。悉種花樹。佳境也。丁酉春三月。偕諸同人往游。作詩記其事。

四圍城郭太樊籠。出郭居然入畫中。不雨不晴春晝靄。香輪碾斷柳花風。

武陵人自綠楊來。小馬紅鴛故故催。大令何須閒問訊。桃花定未十分開。出城時適有自信陽來者。張持之口占一絕。有馬上相逢君且住。桃花今日幾分開之句。故云。

笑謝村人忒有情。隔籬指點卸鞍城。信陽城俗名城南城北皆芳樹。可檢花香多處行。

長隄蜿蜒百花間。隄上風光詎等閒。不斷烟林濃罩處。忽然一角得青山。隄上見馬谷山

弔古依稀歷劫新。炎劉事業付輕塵。夕陽紅徧淮陰壘。花柳年

年送暮春

相傳城為韓信屯兵處

銅陵花堰已蕭條。霧雨霏霏豔昨朝。

時杏花已謝

底是清明如駛過。

閒村猶響賣餠簫。

呢人新綠漾平蕪。西北天遙與未孤。一氣混茫香是海。最分明

處更模糊。

弱枝拖處壓平田。似蓋層層別樣圓。便欲為巢花樹裏。被人錯

喚海棠顛。

別嶽

仙人堂與不曾經。賴有新詩慰嶽靈。他日征衣莫輕浣。帶來三

十二峯青。

題顧蘆汀煨芋圖

何須投筆說班超。枯坐蕉龕

蘆汀齋名

夜寂寥。鑪火半殘山芋熟。滿

天風雪鎮蕭蕭。

鞏縣弔杜工部

秋風黯黯雨絲絲。鞏伯城東立少時。未許青山忙送客。停車還

拜拾遺祠。

自題畫冊五首留別余吾

鈔三

離人足底是青山。

余舊句

今日青山更不閒。竹杖一條雙蠟屐。不

武定詩續鈔
知何福穩鄉關

十年殘夢破荒雞。故棧依稀認馬蹏。萬點秋山一江水。遠雲遮斷益門西。

酒旗春店最分明。小麥如鍼隴上生。古道送人何處去。一天楊柳綠無情。

王敬齋索畫蘭得六絕句 鈔一

坡陁淡埽長莓苔。九畹風姿到眼來。別有天然供妙悟。空山流水又花開。

武定詩續鈔卷八

利津李佐賢竹明編輯

張映緯 見前鈔

字經德海豐人。治園公姪。乾隆戊子舉人。揀選知縣。著

鴻雪齋詩稿。郡志文苑傳。映緯窮經不泥傳註。期於愜心。其文老而益工。尤工詩。游桑菽甫先生門。有詩一帙。先生見而歎曰。漁洋秋谷有嗣音矣。○前鈔以公詩屢徵不至。為憾。今始從其家覓得全帙。急登若干首以補前鈔之遺。

寄懷朱野君

南山何蒼翠。灤水亦清泚。朱君素心人。于斯得棲止。伊昔登其

堂迎我會倒屣披豁如舊交一笑忘年齒公長予二十餘歲為我張酒筵邀客開詞壘老子興不淺謝家羣從美拔幟遽先登成列未能俟笑予慣數奔不能執鞭弭瀾翻百氏言瓶瀉六義旨吁嗟如斯人乃置巖壑底聞公少壯時單車走帝里韞玉思一副俯身拾青紫材大用為難黃鵠摩天起誰能輒紅塵苦索長安米孺子勤稼穡幼女語經史此景良不惡儘足陶洗耳契濶今已深歲月一彈指時為歌蒹葭矯首秋色裏

寄懷董內翰曲江

吾黨二三子健者惟董公被褐三十載奏賦明光宮乃知沖天

翼須會扶搖風憶與君相識實維丙寅冬荷君忘形交追逐如雲龍識度愧巨源將毋臭味同為予揚騷雅斧斯侔鬼工是時朱孺子謂朱式魯精悍持刀弓掉鞅上詞壇吐氣長如虹君顧笑謂予獬兒難爭鋒藉子當一面壁上觀兩雄斯言雖諧謔期待意何隆詎謂良會難聚散隨萍蓬舊日樽俎地螢飛草茸茸嗟予更獲落埋身文牘中強歌聲不盡獨絃意忡忡側聞金臺旁大聲發鐘鏞上國多英彥敦盤何雍容問誰主壇坫君旆建高空焉得往從之一披萬古胸

凡栽芍藥者必閱一歲始花我友朱君式魯移植數本當

春卽見蓓蕾喜極以書來索予詩紀之爲賦長句

阿瞞驕陽春。羯鼓催花柳。無乃會其時。侈然遂借口。我友朱孺子。真奪造化手。騷雅推總持。吐氣凌星斗。高義猶未嫁。戢翼臥畝畝。時復愛種植。抱甕露兩肘。紉佩正則蘭。娛賓杲之韭。山卉與野蔬。管蒯亦所取。中有廣陵豔。移來苦不久。空誦紅藥篇。翻階想對酒。詎知盈寸栽。曄曄華蔕剖。此看三春餘。天香蒸茅牖。失喜欲發狂。遶籬日數走。報余遣長鬢。此事良不偶。豈其草綠章。通明一爲扣。乃知大塊文。只合詩人有。蘇子逞豪翰。霜曉出翠阜。韓公鏗雄詞。嶽雲埽如帚。非時出塊麗。可有成例否。一語

轉寄君。開日卽招某。楚雖爲晉細。頗忘微蠶醜。君歌我當和。一爲此花壽。

桑菽甫先生惠華山詩集讀竟書後

人世逼仄吾足誠難投。何事登山臨水不自由。半爲婚嫁半仕宦。坐失靈境夫誰尤。先生信是五嶽客。朝參早懶標休休。掉頭曾踏太湖三萬六千頃。更思凌雲縹緲尋丹邱。中嵩已徧登西華。一筇獨往穿猿猴。腰腳天生濟勝具。驚人奇句衝咽喉。決背西南盡滇蜀。蒼烟點點窮維陬。當其得意忽大叫。巨觀囊括歸吟謳。我讀未竟快擊節。恍隨杖履同句留。男兒胸蟠邱壑手捉

筆興酣攬怪兼絕幽。昌黎投書真可笑。此身便合終老太華之
峯頭。神興飛揚氣何邁。獨問真源趁高秋。時當傾盆霖雨盛塵
埃。一洗清光淨。石骨青蒼瀑爭瀉。放晴恰與畸人謀。心肝昭融
岳神鑒。公喜晴詩默禱灑靈有何異海市忽湧衡雲收。乃知才
者雖然於世招吠怪。名山正喜供雕鏤。只恐多取或犯造物忌。
雷電六丁來下求。噫吁嘻中峯聳處去天僅尺五。東峯西峯左
右拱揖儼獻酬。下視河渭注一漚。橫穿日月拋雙毬。香鑪仙掌
各殊狀。蓮花一朵青修修。箭栝博臺毛女洞。奇險一一恣冥撥。
如此異景無人收拾去。那可更無此老獨立縹緲之雲樓。嗟予

亦有于期志。足跡不能出方州。壤蟲焉知天地大。定把茲編當
臥游。

函谷關懷古

山連東南西北走。臨流忽斷勢更陡。綠山一綫啟重門。斜帶長
河倚重阜。內障三秦作屏藩。外踞八州之襟肘。崢嶸知是古函
關。獨眺躊躇倒杯酒。威制六合帝業成。鞭笞曾出暴秦手。九國
雄師振籜飄。二周寶鼎探囊取。吁嗟乎以詐力滅國國能弁。以
詐力欺民民難有。輻輳未滅鮑魚腥。叢祠已聞妖狐吼。一夫大
呼羣響應。子嬰繫組殊可醜。兵銷猶有揭竿人。儒坑尙餘授書

五定詩續錄
四
叟。隆準重腫先後入。百二雄關等摧朽。後來喪亂更紛紛。軹道實爲降王首。君不見周家卜基八百年。不以山谿以忠厚。

過韓城詠子房

秦帝方虎視。沙中把椎揮。漢王已龍飛。殿上曳履歸。一生智勇爲韓竭。利不爲疾威不怵。赤松子黃石公。寓言耳誑兒童。功人功狗羞與齒。臣仇旣報臣去矣。

爲沈荻林先生題明湖秋泛圖

蓮子湖波雨霜冷。空明倒寫遠山影。浪花風翠靄濛濛。衝散鳧鷖搖舴艋。涉江騷客采紅蓉。泛宅散人烹綠茗。沈吟浦漈恣沿

漚。愛看水面秋光迴。葉花無際雪霏霏。千頃澄鮮相與永。欸乃一聲天地空。飄飄身世萬慮屏。前谿餘響扇流風。使我沂州心耿耿。

廬州寓舍友人餽蟹發藏酒飲之醉賦長歌

右手持酒杯。左手持螯蟹。我生涉世本爲口。蘇長公句坡老甯肯欺吾曹。況復庭際歇秋雨。竹樹聲已聞刁騷。客懷秋思惱不徹。空齋獨坐蠶絲繅。何來八跪初就縛。堆盤磊落黃流膏。朱紅泥印斜紋破。濃香鬱鬱騰藏醪。此時猶不解痛飲。醉鄉古路藜藿嫫。袞袞場中紛冠蓋。誰暇啜漓兼餽糟。物各有主夫何讓。天其或

正定詩集卷八
五
者憐老饕。引杯徐徐忽酣縱。奔泉渴驥鷹掣絛。一斗一石那足
計。眼花耳熱燈光搖。此行千里少快意。今夕何夕陶復陶。試爲
數典聊解嘲。一官曾爲蓴鱸拋。介介廉士乞餘李。桓桓武夫爭
二桃。不知許事食蛤蜊。賓筵酬對丰神超。腹負將軍良細事。將
軍負腹非人豪。禮俗聞之定大笑。老夫醉矣將汝逃。

夜讀李空同先生詩集

空同作者無與儔。詞壇高築橫千秋。手把殘編乍神往。騰紙光
怪清昏眸。崑崙墟導子杜子。許身憂國同綢繆。凌雲奇彩蔚鸞
鳳。殷地鉅響鳴鐘球。睠念靈修黯身世。幽憂不斷蠶絲抽。是時

有明文運漸靡敝。才子烟月誇揚州。當風一嘶啣羣馬。起衰巨
手勇挾輶。峻嶒大節標嵩邱。元立省署風力適。代草曾劾奸強
豎。揮撻直凌貴戚侯。乃知詞源噴薄本浩氣。成此萬古江河流。
詩者要是性情物。寸田忠愛勤耘耨。隋花宋葉徒爲爾。乾坤大
義淪荒陬。好爲論議虞山老。句櫛字比尋癩尤。我起爲公醉一
卮。光燄萬丈衝斗牛。但使詩卷長留在天地。勞叨置喙當自休。
余以病不飲者數旬。作長歌卻寄吳和叔。兼呈二三酒友。
余本淡蕩人。生平寡所慕。麴生與友生。頗得此中趣。今年浪作
三晉游。雲山千里阻且修。碧波芳草懷人遠。天畔游子獨登樓。

武定詩集卷八
極目轉蕭索。桃花柳絮春陰薄。有時風雨過閒門。自憐形神半
落拓。爲我拉取麴生來。一洗殘春別離惡。竭來抱病忽經旬。未
許糟邱作酒民。蠶絲自縛真不解。卻將能事輸伯倫。西來我友
把我臂。相與選師作酒戲。長空雲凍雪垂檐。小院梅開香撲地。
一鼓作氣齊伸眉。兩軍之士忽交轡。君拔蝥弧敢先登。三秋搏
擊鷹初鷲。謂吳和叔臣叔自足張吾軍。獨成一隊人辟易。謂九座中
更推此公狂。掀髯一笑冠幘墜。謂場西源坡老不飲亦復佳。俯仰筵
前同醒醉。謂吳燕巢李君浩氣發長歌。銀燭光寒吐紅穗。謂李方軌是時
髡心爲最歡。五斗一石如渴驥。樂且未央恨逝波。一身飄泊遙

關河。縱復樽罍得常把。何人起舞同婆娑。區區猶不爲余畀。今
之視昔何偏頗。人生不得行胸臆。雖復百年亦蹉跎。君不見徐
邈留名惟酒儉。謝奕負氣罵老兵。枯腸能使芒角出。古今將母
同此情。麴生麴生且已矣。權退三舍聊避爾。終須治兵遇舊徒。
或恐馬逸不能止。爲問諸公興若何。婦人之言莫入耳。

池上樂

太華峯頂蓮十丈。磴道盤雲不可上。青泥碧水發華滋。一夜菡
萏開曲池。池外有石石遶竹。竹外湘簾讀書屋。有時倚竹復看
花。子猷客舍濂谿家。

插瓶花

菜花白蒿花黃。大紅月季冠中央。紫色海棠雖閨位。小婢點綴
夫人旁。小嫌攢簇少遠致。幾枝瘦竹間青蒼。錦帳牡丹弄嬌影。
金堦芍藥翻濃香。此花于我既無分。為爾寂寂羞韶光。攬拾雜
卉正多種。白黃紅紫輝茅堂。吾吟詩爾可聆一章。吾飲酒爾可
勸一觴。胸中但得逍遙趣。九萬何異捨榆枋。況復行年過半百。
安能戚戚希非望。

荆軻

荆卿荆卿刺客雄。單身直入豺虎叢。舞陽震恐荆軻笑。史公妙

寫神勇照。所嗟甯在劍術疏。博浪椎亦中副車。

漢高祖

韓彭被菹醢。功名緣震主。吁嗟老鄼侯。數與獄吏伍。鼎上杯羹
棄翁姥。乃為定陶美人淚如雨。

投刺

古人重投刺。三年滅卻懷中字。今世妄干人。一日踏徧道上塵。
僕夫汗流輿夫喘。何曾一人能入眼。問君底事多周旋。答曰官
場禮則然。吁嗟乎同寅協恭甯非古。徒爾聞聲亦何取。面猶不
知心詎知爭怪翻手作雲覆手雨。

會孝女
我作孝女行。撲筆歌慨慷。風火助虐何披猖。老親病瘴委臥牀。
孝女號呼遶牀走。燎方揚撲以手。談逾張掩以肘。不能反風滅
火活吾親。猶能同親化灰塵。我謂祝融兮何不仁。忍令母子合
燼成烏薪。君不見曹娥入水負父屍。奇節共此慚鬚眉。

為庭錫韓姨丈題畫屏

十日五日一水石。王宰始肯留真跡。吾謂作詩亦有然。命筆會
須意興適。今見此幅心眼開。十丈素壁移蓬萊。平時推敲撚鬚
苦。忽覺腕底風雨來。胸有邱壑畫在紙。索寞枯腸芒角起。試問

解衣磅礴時。詎勞尺尺寸寸為。

昔遊曾到王官谷。在山西虞鄉縣短橋曲水遶林麓。忽聞澎湃下青雲。

一道飛泉裂巖腹。山色樹色蒸華滋。好女亭亭出膏沐。忽忽遠
夢發十年。點綴清妍是此幅。君放天機我懷舊。背癢各搔孰不
足。

中秋月食有作

歲甲戌游汴。會中秋月食。鐙下繙玉川子作殊傷其呼
搶太甚也。遂有是作。

昌黎曾言一年明月今宵多。前期早擬對酒兼當歌。如何薄食

巧爲患。佳辰坐令空蹉跎。矯首長檐一騁望。星如撒沙綴絳河。
唐突黑燄盤空上。當天一綫爛銀拖。清光只留些子在。翻似蛾
眉初出描青螺。倏吞倏吐疑格鬪。子羽投璧三騰波。忽憶當年
玉川子。庭中涕泗勞滂沱。爾心雖有鐵一寸。奈無上天梯橙何。
我聞素娥青女。儲有霜華露藥萬萬斗。曷弗傾來把此冰輪磨。
不然吳剛手持斫桂斧。亦可橫空一掃除。么麼蟣虱之臣。爾則
那。人生所憂有定分。杞人魯女心徒瘳。此事于爾儒生復何有。
夫子尙自傷無柯。所嗟當前敗我興。不放激灑金光浮。巨羅我
來申州笑失計。風雅蕪沒空吟哦。鄒枚高杜何李去。且久。
吹台中

有五賢祠龍文百斛埋山阿。古人已往猶見古時月。一樽勸我朱顏
醜。百年夜夜燭當秉。中秋況復容虛過。癡絕妖墓不解事。憤起
直欲請天戈。賸拌終宵不成臥。遲爾圓照舞婆娑。

由鞏縣抵洛陽日行百二十里倦極作歌

朝行雞聲喔。晚行星光懸。晚不得休朝不眠。塵沙沒髀殘秋天。
石路犖确馬不前。草草勞人發遠想。我生奔馳逾十年。羊腸世
路耗心力。蛇尾年華惜時日。曩者尙作山川游。于今竟爲干謁
出。山川游志昂藏。干謁出氣抑塞。入門每笑拙言辭。旅進亦慚
失顏色。吁嗟乎以貧爲病非能賢。爲饑所驅殊可憐。由來寂寞

掩關者何嘗皆有半頃田。君不見雪廬閉戶臥袁安。又不見管甯坐久牀爲穿。古人豈甘勞其形。古人甯願徇其名。與其枯槁隨人作俯仰。不如貧賤肆志作達生。當其嘯歌發吐氣。何啻嚼好歸來休徘徊。松竹已荒猿鶴猜。茅屋石田生計不可說。猶勝凌兢驢背度歲月。

有贈

話公少年事。使我興飛揚。意氣千金土。恩仇一劍霜。微官兼吏隱。秋水淡行藏。精悍餘眉宇。終須貢玉堂。

春日揚觀臣招同袁毅可余漪園小集用杜少陵游何將

軍園林十首韻

別院孤亭迥。景含春暮清。花繁時見蝶。柳暗忽聞鶯。泉眼漱鳴玉。谿毛馨薦羹。尋幽得心賞。攜手信徐行。偶發山林興。浮榮悟落花。素心盟海鳥。機事忘杯蛇。鳴綠波堪盪。鷺黃酒可賒。盤桓吾計得。到處便爲家。

洛陽縣署守歲用趙秋谷先生潮州除夕韻

游人戀殘臘。守歲洛東偏。身逐嵩雲遠。心隨海月懸。離懷盈此夕。浪跡已他年。余在外已六度歲矣猶喜平安信。迢迢遠道傳。鐙光搖漾處。少長綺筵開。爆竹喧連舍。疏梅豔照杯。日歸虛歲

五言詩集
暮不速有朋來。互勸姑謀樂。休教白髮催。

過東昌訪董曲江先生留飲有贈

蓮湖風月好。曾許共仙舟。一顧迴青眼。重逢感白頭。樓遲公若此。飄泊我何求。素志蕭條在。長歌浩莫收。廿載重相見。尊前感慨多。煙雲渺北關。涕淚痛西河。著述名山在。滄桑小劫過。喜君能作達。醉後一婆娑。

宿徘徊鎮過小南山禪院

暝色前山合。蒼茫獨倚樓。鄉心原易感。遠目亦工愁。節物思千里。烟霞悅一邱。買山空有願。欲去重回頭。

策披圖愧俗顏。終慚負幽意。已見鬢毛斑。

入函谷數里有懸崖。臨河方廣畝。許與姚子靄。亭沈子肖巖。置尊其上。濤聲澎湃。近在兩腋間。秦嶺中條亦復映帶左右。為浮數大觥。醉賦四韻。

虎鬪龍拏過亦休。得開尊處且夷猶。浮來杯底千山影。瀉入胸懷萬里流。恃一丸泥蛙自大。提三尺劍鹿先收。拋將今古興亡感。與覽秋光豁醉眸。

宜陽明府招同九日錦屏山登高

當杯自覺意崢嶸。碧宇霜澄四望清。高會忽逢千里客。重陽偏

放一朝晴。橫汾簫鼓隨流水。栗里琴尊藉落英。佳節由來難負。卻更無餘涕為霑纓。

更上高層覽八荒。寒蕪秋色倍蒼涼。揮戈白日愁遲暮。荷鍤青山縱老狂。蠟屐黏來巖翠冷。匏尊泛入澗花香。擬追勝賞龍山月。莫便言歸趁夕陽。

題羅困碧酒人說冊子次栖雲閣韻

富貴浮雲苦未真。無功鄉裏愛沈淪。但教賢聖時中我。便是羲皇以上人。裕之詩。獨有醉鄉人。中有羲皇醇。洗盡機心差可喜。醺來古態倍堪親。此中妙理知難頌。好錫嘉名喚老春。

汴梁旅次桑菽甫先生枉顧并惠詩扇賦呈

吹臺風雅地。一老喜同游。我亦工懷古。時當已暮秋。淋漓分醉墨。跌宕上仙舟。猶有元言在。從容載酒謀。天涯得知已。感激異平生。混跡初游洛。隣才欲播名。佳人推越絕。國士笑齊儉。格律新偷取。階前試一鳴。

蛩

爾何與搖落。唧唧動哀吟。轉使他鄉客。難平此夜心。挂愁樓月迴。搖夢壁銜深。好結鳴秋伴。相將和暮砧。

由陝州赴磁鐘。隸人導余取僻路而南途極幽峭。歷數村

五言詩集卷之三
墟林壑尤美為賦四律 鈔三

一落驚千丈。森然絕壁開。日從鴉背閃。谿傍馬頭迴。樹樹宿朝
雨。峯峯含古苔。尋幽誰到此。欲去更徘徊。
蛇徑盤迴處。人家畫不如。斜陽靄雲木。流水抱村墟。稼足介眉
酒。園多供客蔬。數弓能借否。吾欲結吾廬。
行行欲欲暝。窈窕歷巖阿。峽束驚風陡。峯留落日多。雲中散雞
犬。洞口暗藤蘿。游屐慚康樂。匆匆一晌過。

題畫

每欲誅茅隱。翛然屋數間。飯牛歌白石。放鶴坐青山。入世無長

清明前一日逢吳和叔前輩來歷下與予不見者四年矣
呼酒共酌即送其西赴秦中

驚看吳霜點鬢勻。一尊且自戀芳辰。禁烟柳入氤氳夢。宿雨桃
合蘊藉春。又向他鄉作寒食。予凡在歷下過五寒食 可堪遠道送行人。空
憐身世渾多感。好為山川發興新。

詠雪用東坡尖叉韻

冒棟穿簾素質纖。沈沈入夜轉清嚴。方圓都已成圭璧。兒女何
須辨絮鹽。欲踏銀沙停蠟屐。欣看冰柱對茅檐。添來物色真無
盡。斌媚青山露數尖。

圖成枯木與寒鴉。賦就銀杯共雪車。自愛掉頭浮竹葉。誰同犬
嚼咽梅花。谿山茅舍迷三徑。天地冰壺共一家。奇絕化工聊玉
戲。形容空費手頻叉。

玉關峽

兩岸青山削未平。玉關峽裏客愁生。危峯倒影千尋暗。古道盤
空一綫明。梯石人家巢鳥背。攀藤客子貫魚行。驚心險絕還相
笑。遠道詩於此處成。

秋雨感懷

蕭條節物古今愁。又向天涯歎滯留。有味田園懷故里。無情風

雨入涼秋。閨中刀尺初長夜。客裏雲山獨倚樓。自是欲歸歸未
得。結廬何處卜菟裘。

戲效香奩題

垂垂細柳記朱門。回首三生一笑溫。秋水愁迷蘭芷渡。春風喜
入芭蘿村。窺人素月弦初上。解意明燈燼半昏。小語喁喁訴恩
怨。斷紅雙頰著啼痕。
曙色曉寒睡起遲。一鑪殘靄伴幽思。愁眉已減晴山綠。癡夢猶
牽皎日詞。蕙草婉孌歸園靜。柳棉輕薄絆風迷。誰憐雲母屏空
夜。管領春情有玉兒。

偶檢篋笥得董曲江朱式魯詩數章感賦

風流二妙步騷壇。盟及江黃會執鞭。花鴨春融人中酒。柳塘月滿夜開船。琴心高下憐知己。鴻爪東西憶往年。剩有錦囊佳句在。臨風展對倍淒然。

雨後同藩吾表弟載德四弟侍九家叔月下小飲

流雲似水雨餘天。薄蕩輕陰欲禁烟。脫帽臨風人爛漫。舉杯邀月影嬋娟。滌殘暑氣披襟爽。延到秋光愛地偏。街鼓頻催入深夜。從來情託易纏綿。

落花

卻罷芳樽與綺筵。韶光逝水暮春天。藏嬌不惜金爲屋。尋豔俄驚玉化烟。轉悔綢繆勞往日。再爲疑盼又經年。淒涼原是繁華種。一劫皆空屬老禪。

立秋後二日登北極臺感懷

曾是應劉載酒地。登臨餘我涕霑膺。中年哀樂情何極。無恙湖山感易生。一片蒹葭迴晚照。千家砧杵起秋聲。感時兼復傷離別。宋玉愁多賦不成。

洛陽

無端野客此閒行。屹立天中有舊城。嵩嶽雲迷含暮色。洛河風

正定詩續金
急入秋聲。著英舊社人何往。曲水華林代數更。千載淒涼名勝地。銅仙枉自淚縱橫。

白阜小酌

古木號空欲暮天。暫因荒驛駐吟鞭。誰能遣此亭長短。時復中之酒聖賢。曲石引泉來戶外。高峯銜月到牀前。攜來何物充行篋。嶽色河聲賦幾篇。

送坂甫先生南歸

底用車前列八騶。先生歸矣儘風流。岱嵩華嶽添吟卷。雪月梅花放去舟。竹苑詞壇誰領管。葑湖漁伴自勾留。元言載酒前期

石漫向驪歌賦別愁。

客秋感懷

逝水穠華憶昔年。麤豪意氣也堪憐。梁園授簡開詞壘。金谷徵歌上舞筵。三晉雲山曾立馬。七橋風月共鳴舷。而今細數寒更裏。種種皆成懊惱緣。

昨夜空庭白露淒。秋來轉不耐栖栖。療飢自笑搬薑鼠。弔影誰憐舞鏡雞。葉亂長林風上下。雲埋老屋雨低迷。粗才未解悲搖落。爭怪先生醉似泥。

夜行值大風雪道旁村舍燈火熒然望之有作

五定詩集卷八
燈火疏林一徑通。土牆茅屋帶牛宮。行人便作三山看。雨雪連
天正朔風。

題畫

數峯相對碧嶙峋。一曲谿流絕點塵。天下谿山甯少此。幾人閒
似畫中人。

歸里過棗園橋

蝶欲成團花滿枝。天韶風物治春時。如何橋下東流水。獨爲行
人照鬢絲。

題查元起清谿放艇圖

填胸浩氣吐虹霓。數尺綸竿手自攜。獨自高吟奏流水。於今誰
是謝征西。

蘭橈棠舟長五湖。瀟瀟秋意滿菰蒲。烟波此日傳佳話。已把頭
銜署釣徒。

馬

江

見前鈔

字桂嶺。號仲牧。又號紫芝山樵。商河人。前鈔晉侯公從
曾孫。乾隆乙酉舉人。揀選知縣。借補榮城教諭。以子毓
林。贈雲南知府。著春帆。閩嶠觀海等集餘閒偶筆。

望海嶺望海

山行苦登陟。石路畏險隘。紆曲無終窮。體倦神亦憊。運岡豁然
開心目。聊一快。大海空眼底。朝宗瀉萬派。島嶼森紫迴。魚龍潛
幽怪。是時風怒號。排空濤澎湃。郡邑勢浮動。舟航如泛芥。水天
望不極。一氣混沆漭。乘桴安能浮。聖言良可喟。

蓬萊閣觀海歌

閣上蒼茫烟霧橫。閣下洶湧波濤生。三山縹緲今何處。惟有碧
浪排空明。長山鼉磯互勾帶。小竹大竹名島環蓬瀛。島嶼起伏非
一槩。有如微雲滓太清。凭欄轉作東北望。平鋪萬里鯨波壯。怪
石亂礁皆剗除。一氣混茫迷下上。放眼天外忽叫絕。鬱鬱之懷

此開暢。蜃樓奇幻非倖邀。登高壯觀亦神王。擊我劍為君歌。有
酒不飲當奈何。勸君飲君莫哀。仙人瑤島皆銜杯。長生大藥空
有說。安期羨門安在哉。試看秦漢方士滿海上。祇今惟有望仙
臺。

秋齋雜感

閒齋澄爽氣。蕭瑟野人同。露重花初白。枝低棗欲紅。經時無熱
客。盡日有清風。正好佳時節。獨憐吾道窮。

朝朝愁桂玉。將次斷炊烟。未必謀生拙。其如托地偏。杜門非謝
客。高枕似游仙。望古徵同調。冷官有鄭虔。

齊中有懷芝庭先生。予告歸博山。

一從違歷下。風雨五經秋。薄宦成中隱。名軒憶小留。先生書屋號小留軒

歌詩餘白雪。耽酒老青州。先生昔與叔祖和菴公讀書白雪樓今日空齋裏。相思

為破愁。

蘇州寄家書

二千里外孤舟客。兩字平安一紙書。夢裏故園秋色迴。醉中吳下舊交疏。逢聽聽雨殘更後。曲岸臨風落照餘。破楚門前無限思。聊將尺素付雙魚。

正月六日螺陽署中夜有感

忽過新春五日後。漫懷往事八年前。光陰荏苒真如夢。南北飄零只似仙。難遣愁心憑魯酒。苦尋佳句寫蠻箋。香殘燭暗無情緒。獨坐更深亦可憐。

雨後重登惠安城北樓即目

新晴自愛郊行好。問柳尋花事事幽。為客正當修禊節。思鄉重上仲宣樓。終年漂泊同雲雁。到處忘機似海鷗。滿目關山望不絕。斷闌干倚徧只生愁。

歲暮寓中排悶

經月眉頭未見舒。胸中磊塊定何如。頻呼濁酒難成醉。漫寫新

詩不當書。雲樹有懷悲斷雁。烟波無計問雙魚。天涯已自傷心
數。況復匆匆逼歲除。

雨後溫陵道中戲仿樂天體

大麥青葱小麥黃。桃花歷亂菜花香。雨鳩聲逐晴鳩喚。粉蝶飛
同紫蝶忙。澗水流澗谿水碧。遠山雲接近山蒼。閩南觸目春如
許。何怪羈人苦憶鄉。

尊經閣秋望

涼生閣上暑將殘。懷抱凌空喜暫寬。高下野禾爭遶郭。淺深山
色入憑欄。逢秋每作歸鄉計。望遠偏愁行路難。漂蕩萍蹤還海

角夕陽西下水漫漫。

寶應舟中夜夢紀事

八寶城西湖上游。水程千里此開頭。驚迴夜半鄉園夢。身在江
南一葉舟。

福州竹枝詞

獅子樓高接鼓樓。樣樓高更北城頭。等閒不敢登樓望。怕惹鄉
心萬里愁。

街頭嘉果徧清香。橘柚參差一色黃。更道閩中風味好。青蘘葉
裹紫檳榔。

高亭子出雲端。城裏山從城外看。平遠臺邊風景別。人家一帶坐烟巒。

劉世傳

字紹薪。利津人。乾隆乙酉舉人。官石樓知縣。

春郊勸農

周繪。幽風圖。漢頌勸農詔。夷中憫農詩。情真句入妙。我今登仕版。敢云但坐嘯。一犁春雨足。行步四野眺。微風麥氣酣。山花帶顰笑。男耕婦子饁。媚依情宛肖。有年在力田。無遺先民誦。吾郡龔少卿。治績久彌耀。緬懷買犢風。庶幾賡同調。

高偉修

字允升。惠民人。乾隆辛卯舉人。官藍田知縣。著春帆集。

官寓書懷

升沈去住總前緣。無事頻催著祖鞭。兩載宦情新白髮。一肩行李舊青瑣。鬚眉久被兒童識。貧病還邀父老憐。畫手詩人共惆悵。征圖留與話他年。

王震霖

字夢巖。濱州人。廩貢。候選訓導。

族姪曾孫繩曾跋夢巖公積學博古書法擅長

於王趙兩家得其神髓詩法盛唐隨意應答皆至性流露繩生也晚會侍几杖記為改詩有益世炎涼烹竹葉

關心風雨問梅花之句今搜其遺集率皆散失於故書中檢得七律一首敬為錄出以為吉光片羽云

漫興

脫然利藪與名場。寄傲聽松舊草堂。鬪酒席間緣客醉。題詩花下為春忙。逸書添購權醫癖。古墨濃磨當炷香。莫笑狂生狂太甚。世間能有幾人狂。

